

Aschtoh I



**Texscht : Mike Sutter
Musig : Mike Sutter**

**Gäng we ni nöime ire Schlange schtange
schtang i garantiert ir lätze a
wär's linggs u rächts scho lengschtens vorwärts gange
chum i ke Santimeter voraa**

**Vor mir die unmügleschte Gseue
Schwär vo Begriff und kompliziert
Wo mit Absicht sech vor mi häre schteue
Was mini Närve masslos schtrapaziert!**

**Im Supermarkt schtöh d'Masse a dr Kasse
I nööchere mi jede Musku gschpannt
Bereit die beshti Glägeheit z'erfasse
Aschtoh isch ä Frog vom Verschtand**

**Dört ar Kasse nüün schtöh nume zwe
Doch haut, beid hei dr Chare platschet vou
Am füfi äne würd's nid schlächt usgseh
Äs euters Ehepaar hingere Frou**

**Doch die hett äs Problem mit ihrer Charta
u leit die ganzi Elektronik flach
nach ändlose fuf Minute warte
schtang i hinge a bir Kasse acht**

**Z'vorderscht schteit ä Dame mi dünkt
Die macht dört vor äs riisehueregschtürm
S'geit um irgendwelchi Bonuspükt
I wächsle d'Kasse süsch berchumi Würm**

**Machet doch e mou do vore, He
Merket dr nid i bi im Ghetz
Oder diene i do inne einisch meh
Aus läbige Bewiis für Murphy's Gsetz**

**Do gseh ni dass am sächsi kei Mönscht schteit
Wie dr g'ölet Blitz schtang i am Bang
Dört druffe äs chliises Schiud wo seit
Benützen Sie die Kasse nebenan**